


## I stagion

Temp da castegn.  
Cun l'estaat lunga,  
dopu i tempest  
l'üga marüda l'ha trai ul büi.  
Ul vin l'è bon e al bagna i mundell;  
i risc iè in tèra.  
Gh'è ammò anca i zücc;  
poca sustanza sotta la pell,  
i düra miga fin al invernu:  
giüst par la bülbura,  
ma di grand furm dai culur fort  
resta una scorza dumà da zücc.  
Croda già i föi  
ma lur iè lì,  
albur cui trunc smagiaat da müfa  
press ai segn negri scotaat dai saett,  
i ram in aria a dig grazie al ciel.  
Föia secca che quarcia i radis  
e un mund da vita prunta a sbogà  
in primavera  
quand volarà  
tanti guriöö süi fiuu dal sambüuc.



9/18 d'utobar dal 2003